

張氏醫通

卷五



張氏醫通卷十二

清

長洲石頑張

璐路玉父纂述

男

以柔安世

叅訂

日本

大泉長菴前田安宅子仁

再訂

嬰兒門下

典子守

夫人習尚不同。趨舍各異。痘疹一門。向得涵高兄採輯諸

家方論。備列醫通。其間方藥多有以意叅易者。惜乎筆削

未竣。完璧難求。志兒心折其學。因命續貂。系以麻疹諸例。

庶不失先哲二者竝名之義云。

錢氏痘疹論



小兒在胎時食母五藏血穢生後其毒當出故痘疹所發皆五藏之液肝水泡其色青小肺膿泡色白而大心爲斑其色赤小脾爲疹其色赤黃瘡疹欲出五藏證具惟腎無候但耳涼尻冷是也瘡疹出時辨視輕重一發便出盡者必重也瘡夾疹者半輕半重也出稀者輕裏外微紅者輕外黑裏赤者微重也外白裏黑者大重也瘡端裏黑點如鍼孔者勢甚也青乾紫陷昏睡汗出不止煩躁熱渴腹脹啼喘大小便不通者困極也凡瘡疹當令乳母慎口不可令饑及受風冷致歸腎變黑難治也有大熱當利小便有小熱宜解毒若黑紫乾陷者百祥丸下之不黑者慎勿下更看時月輕重大抵痘疹屬陽出則春夏爲順秋冬爲逆又當辨春膿泡夏黑陷秋斑冬疹亦不順也黑者無問何時十難救一其候寒戰噤呀或

身黃腫紫。急宜百祥丸下之。復惡寒不已。身冷汗出。耳尻反熱者。死。腎氣大旺。脾虛不能制故也。下後身熱氣溫。欲飲水者可治。脾旺勝腎。寒去而溫熱也。治之宜解毒。不可妄下。下則內虛。多歸於腎。若能食而痂頭焦起。或未焦而喘。實者四順清涼飲下之。若身熱煩渴。腹滿而喘。大小便瀉。面赤悶亂。大吐。此當利小便。不瘥者。宜風散下之。若五六日痂不焦。是內發熱。熱淫蒸於皮中。故痂不得焦。宜宣風散導之。用生犀磨汁解之。便熱退痂脫矣。○瘡疹欲出。先欠呵頓悶。肝也。時發驚悸。心也。乍涼乍熱。手足冷多睡。脾也。面腮頰赤。欬嗽噴嚏。肺也。此四藏證俱見。惟黑者屬腎也。瘡疹乃五藏之毒。內一藏受穢多者。出則歸其藏矣。

丹溪叅補陳氏痘疹論

小兒瘡疹。大抵與傷寒相似。發熱煩躁。臉赤唇紅。身痛頭疼。
乍寒乍熱。噴嚏呵欠。嗽喘痰涎。始發之時。有因傷風傷寒而
得。有因時氣傳染而得。有因傷食嘔吐而得。有因跌撲驚恐
瘀血而得。或爲竄眼驚搐如風狀。或口舌咽喉肚腹疼痛。或
煩躁狂悶。昏睡自汗。或下利。或潮熱。證候多端。卒未易辨。須
以耳冷尻冷足冷驗之。蓋瘡疹屬陽。腎藏無證。耳與尻足俱
屬腎。故獨冷。又不若視其耳後有紅脈赤縷爲眞候。調護之
法。首尾俱不可汗下。但溫涼之劑。兼而濟之。解毒和中。安表
而已。虛者益之。實者損之。冷者溫之。熱者平之。是爲權度。如
庖人籠蒸之法。但欲其鬆耳。蓋毒發於表。如苟妄汗。則營衛
一虛。開泄瘡爛。由是風邪乘間變證者有之。毒根於裏。如苟
妄下。則內氣益虛。毒不能出而返入焉。由是土不勝水。變黑

歸腎。身作振寒。耳尻反熱。腹脹黑陷。十無一生。汗下二說。古人深戒。以此視之。瘡疹證狀。雖與傷寒相似。而治法實不同。傷寒從表入裏。瘡疹從裏出表。故也。如欲解肌。葛根紫蘇可也。其或氣實煩躁。熱熾便秘。則犀角地黃湯。或紫草飲。多服亦能利之。故雖云大便不通。少與大黃。尤宜斟酌。若小便赤少者。分利小便。則熱氣有所滲出。凡熱不可驟遏。但宜輕解。若無熱。又不能起發也。○瘡疹分人清濁。就形氣上取。勇怯凡已發未發。但覺身熱。證似傷寒。疑似未明。先與惺惺散。參蘇飲。熱甚則升麻湯。人參敗毒散。張涵高曰上方俱難應一用當以輕劑透表為妥見紅點。便忌葛根。恐發則表虛也。凡痘瘡初欲出時。身熱鼻尖冷。呵欠欬嗽面赤。便宜升麻湯加山查大力子。則瘡稀疎易愈。凡痘瘡發熱時。法以惡實子為末。蜜調貼顙門。免有患

眼之疾。凡初出之際。須看胸前。稠密。急宜消毒。飲加查肉黃
芩紫草。減食。禁加人參。初出之時。色白者。便大補氣血。參耆
朮草桂芍芎歸。若大便瀉。加木香肉豆蔻。初起時自汗不妨。
蓋溼熱熏蒸而然。有初起煩躁譫語。狂渴引飲。若飲水則後
來靨不齊。急以涼藥解其標。如益元散之類。凡瘡已出。可頻
與化毒湯。當去升麻出不快者。加味四聖散。或紫草飲。紫草木通
湯。及快斑湯。出太甚者。人參敗毒散。色赤。犀角地黃湯。疎則
無毒。密則毒盛。宜多服涼藥解之。庶無害眼之患。爐灰色白
靜者作寒。看齊湧者燥者。煖發者作熱治。黑屬血熱。涼血
爲主。白屬氣虛。補氣爲先。中黑陷而外白。起得遲者。則相兼
而治。凡痘瘡分表裏虛實。吐瀉少食爲裏虛。不吐瀉能食爲
裏實。裏實而補則結癰毒。陷伏倒靨灰白者爲表虛。紅活綻

起爲表實。表實而復補表。則潰爛不結痂。痘瘡分氣血虛實。虛則黃耆養營活血之劑。佐以風藥。實則芍藥黃芩爲君。佐以白芷連翹之類。調解之法。活血調氣。安表和中。輕清消毒。兼而治之。溫如當歸黃耆。涼如前胡葛根。佐以川芎白芍。枳殼桔梗。羌活木通紫草之屬。則可以調適矣。黑陷二種。因氣虛而毒不能盡出者。酒炒黃耆紫草人參輩。黑陷甚者。用燒人矢。蜜水調服。癢塌者。於形色脈上分虛實。實則脈有力。氣壯紅紫。虛則脈無力。色淡平塌。虛癢以參耆實表之劑加涼血藥。實癢如大便不通。少與大黃寒涼之藥。下其結糞。氣怯輕者。用淡蜜水調滑石末。以羽潤瘡上。瘡乾宜退火。祇用輕劑。荆芥防風牛旁之類。上引用升麻葛根。下引用檳榔牛膝。佐以貝母忍冬白芷枯萸之類。若咽喉痛者。鼠粘子湯如聖。

飲選用。喘滿氣壅者。麻黃湯加黃芩白芍石膏。煩渴瀉利者。烏梅與萊菔豆黑豆作湯。時溫服之。瀉利嘔逆者。理中湯加木香。將欲成就。却色淡者。宜助血氣。芎歸芍藥紅花之類。將欲成就。却色紫者。宜涼血解毒。生地芩連連翹之類。甚者犀角大解痘毒。淡白色將靨時。如豆殼者。蓋因初起時飲水多。其靨不齊。俗呼爲倒靨。但服實表之劑。消息二便。如大便秘。通大便。小便秘。通小便。小便赤澀。大連翹湯。甘露飲。大便秘結。內煩外熱者。小柴胡加枳殼最當。或少與四順清涼飲。瘡疹用藥。固有權度。大小二便不可不通。其大便自下黃黑。則毒已成。不必多與湯劑。但稍與化毒湯。不用亦可。二便一或閉焉。則腸胃壅遏。脉絡凝滯。毒無從泄。眼閉聲啞。不旋踵而告變矣。陷入者。加味四聖散。更以胡荽酒薄敷其身。厚敷其足。

噴其衣被。併厚蓋之。若猶未也。獨聖散入木香煎湯。若其瘡已黑。乃可用錢氏宣風散加青皮。錢氏云。黑陷青紫者。百祥丸下之。不黑者慎勿下。知其所下者。瀉膀胱之邪也。又云。下後身熱。氣溫欲飲水者可治。寒戰者爲逆。知其脾強。土可以制水也。百祥丸太峻。宜以宣風散代之。瀉後溫脾。當用人參茯苓白朮等分。厚朴木香減半爲妙。蓋瘡發肌肉。陽明爲主。脾土一溫。胃氣隨暢。何痺不消。脾已泄之。腎水乎。此錢氏不刊之秘旨也。○其壞瘡者。一曰內虛泄瀉。二曰外傷風冷。三曰變黑歸腎。○近時痘疹。多宗陳文中木香散異功散。殊不知彼時立方之時。爲嚴冬大寒鬱遏。痘瘡不得紅綻。故用辛熱之劑發之。今人不分時令寒熱。一槩施治。誤人多矣。夫渴者用溫藥。癢塌者用補藥。自陳氏發之。迺出前輩。然其立方

多用燥熱。或未適中。恐其立方之際。必有挾寒而虛者。設也。痘疹多是毒氣盛。便先宜解毒。然恐氣血周貫不定。故隨後亦宜兼補。以助成膿血也。

薛立齋痘疹大要

痘疹大要。與癰疽治法無異。宜辨表裏虛實寒熱。蓋表虛而用發表之劑。輕則斑爛。重則不能起發而死。裏實而用托裏之劑。輕則患痘毒。重則喘急腹脹而死。裏虛而用疎導之劑。輕則難以貫膿結痂。重則不能結靨落靨而死。治法可不慎哉。若臂赤發熱疼痛作渴。能食便秘。此形氣病氣俱實也。雖在嚴冬。必用四順清涼飲。以救其陰。若黑陷不食。嘔吐泄瀉。寒戰咬牙。手足逆冷。此脾土虛敗。寒水所侮也。雖在盛暑。必用六君薑附。或陳氏異功散。以回其陽。此內經舍時從證之



法也。若起發遲不紅活。不作膿。不結痂。或發熱作渴。飲食少思。此脾胃虛弱也。參耆四聖散補之。若雖起而色白。雖灌膿而不滿。雖結痂而不落。或癢塌作渴。飲湯腹痛不食。嘔吐泄瀉。此脾胃虛寒也。陳氏木香散以溫之。其在四五日之間死者。毒氣盛真氣虛。而不能起發也。六七日之間死者。元氣虛而不能灌膿也。旬日之外死者。邪氣去脾胃敗。而元氣內脫也。治者但能決其死。而不知其死必本於血氣虧損。苟能逆推其因。而預爲調補。豈斷無生理哉。蓋起發灌膿結痂三者。皆由脾胃榮養。不可妄投剋伐之劑。以致其夭枉也。至於大人患此。治法迥異。昔丹溪嘗治一老人。初患痘。昏憤不知。亟用大補四十餘劑。出痘而愈。觀此可見。

魏桂岩逆順險三法論

夫痘分通順險法。古無有也。愚妄立之。何則。順者吉之象。逆者凶之象。險者悔吝之象。治痘而執此三法。以觀形色。驗吉凶。將無施而不當也。蓋痘發熱三日。放標三日。起長二日。灌漿三日。收靨三日。始於見形。終於結痂。凡十四五日之間。而已。是故吉不必治。治則反凶。凶不可治。治之無益。至如險者。治之則可以轉危就安。夫氣血盛。斯毒已解。氣血損。則毒難愈。惟氣血弱者。雖毒不能頓解。故必加補益扶持。使生意固乎其中。無不平矣。余嘗苦心究討。定立法式。觀者幸毋以余爲僭。

一二日。初出如粟。血點淡紅潤色。於口鼻年壽之間。先發兩三點。順之兆也。○形如蠶種。紫黑乾枯。於天庭司空印堂方廣太陽等處。先見者。逆之兆也。雖稠紅潤澤成箇者。亦

險也。○圓暈成形。乾紅少潤。險之兆也。險者毒雖犯上。其氣未離。候其氣血交會。保元湯加桂。
二三日。根窠圓混。氣滿血附。長發飽滿。光潔爲順。○根窠無暈。氣失血散。枯死不長爲逆。○根窠雖圓而頂不滿爲險。保元湯加芎桂。
四五日。大圓光澤。大小不一。氣和血就爲順。○綿密如蠶種。黑陷乾紅紫泡者爲逆。○根窠雖起。色不光潔爲險。保元湯加桂糯米。
五六日。氣會血附。紅活鮮明爲順。○氣雖旺而血不歸附。灰陷紫陷。或發水泡。癢塌爲逆。○氣弱血微。光白不榮爲險。保元湯加木香芎歸。
六七日。氣化漿行。光潔飽滿爲順。○漿毒不行。神去色枯爲

逆。○氣血不足。不能成漿爲險。急以保元湯加桂米。

七八日。氣旺血附。神全色潤爲順。○毒不化漿。色枯乾紫爲逆。發癰者可治。外剝者必死。○氣血少緩。毒雖化而漿不滿爲險。保元湯加桂米。

八九日。漿足根化而無他證爲順。○漿不足而成外剝者爲

逆。○漿不充滿。血附線紅。氣弱者爲險。保元湯加薑米。

十一二日。血盡毒解。氣調漿足而斂爲順。○氣弱血凝。枯朽

剝盡爲逆。○血盡漿足。溼潤不斂。內虛爲險。保元湯加苓

朮。

十三四日。氣血歸本。漿老結痂爲順。○毒未解而脫形。諸邪

並作。雖結痂爲逆。○漿老結痂之際。或有雜證相併。不可

峻用大寒大熱之劑。保元湯隨證加減。

十四五日。氣血收切。痲法明爲順。○痲未易落。寒戰咬牙。
譏語狂煩。疔腫作者爲逆。○痲落潮熱。唇紅口渴。不能食。
者爲險。四君子加黃連山查陳皮。不解大連翹湯加減。
論曰。保元湯。卽東垣所製黃耆湯也。不越下人參黃耆甘草性
味甘溫。專補中氣。而能補火。故虛火非此不去。人參固內。黃
耆固表。甘草解毒。借以治痘。令其內固外護。扶陽助氣。使氣
生血附。藉此載領。有回生起死之功。或云。氣血與毒同途。何
專理氣而不理血。殊不知氣旺自能載領其血也。或曰。桂者
辛物。痘出已熱。而更用之何也。蓋取其辛甘發散。助參耆之
力。而成偉功也。今更採入痘科諸方。協助保元湯。以收圖治。
是以升麻湯。和解湯。四順清涼飲等。有開濟之功。故用於三
日七日保元之前。解毒湯。大連翹湯。參蘇飲等。有平治之能。

故用於十四日前後。四君子湯。生脈散。桔梗湯。參苓白朮散。四苓散等。故用於保元之間。有贊相之能。不拘日數。白螺散。治痘之不收。金華散。治痘後肥疳。疥癬。生肌散。治痘疳蝕。不斂。以上諸方。不過_下翊運保元。以濟陰陽虧盈之變。治痘用藥之要。始出之前。宜開和解之門。既出之後。當塞走泄之路。痼落已後。清涼漸進。毒去已盡。補益宜疎。其他雖有奇方。不合中和之道。悉皆不錄。

翁仲仁痘疹論

夫痘由中以達外。用藥因期而變通。以常言之。發熱三日而後見標。出齊三日而後起脹。蒸長三日而後灌膿。漿滿三日而後收靨。故發熱三日。當託裏解毒。使其易出。亦有氣弱而不能出者。當微補其氣。氣和則出快。切不可輕用黃耆。恐膜